

尊官法師中朝之賜衣也言語不同中華食牛羊肉而飲酒番物名不一志載惟足力麻鐵力麻毯毯三種而自蜀人言者有曰細毯工布毯毯絨邊工毯姜納大貨貼裡綿惟憑粗細顏色定價值川扇不知起自何時然李德裕有畫桐華鳳扇賦云未若繪茲禽于素扇動涼風于羅薦則唐時此地已嘗製之矣竹本蜀所富有第不甚堅厚紙則出嘉州彭縣輕細柔薄惟可製扇是其來已非一日欲不充貢得乎

諸葛鼓乃銅鑄者其形圓上寬而中束下則敞口大約若今楂斗之倒置也面有四水獸四周有細花紋其色不甚碧綠擊之彭彭有聲如鼓云置下水擊之其聲更鉅

青城在灌縣西南八十里王褒經云黃帝封爲五岳丈人乃嶽瀆上司俱仙崇秩天下有三十六洞天此其第五上有流泉懸樹一日六時洒落謂之朝泉天倉諸峰三十有六前十八謂之陽後十八謂之陰前號青城後號大面又有七十二小洞應候八大洞應